

CARNAVAL COMITEE A WORDE REORGANIZA

Despues di a fracasá Diadomingo 14 di Januari, Central Carnival Comitee a bolbe tene un reunion Diabiernes pasá pa dicidi definitivamente, si Carnaval lo continuá riba Aruba of no.

Afortunadamente tabatin mas persona presente durante e ultimo reunion, entre locual un directiva nobo a worde formá.

Sr. Adriaan Arends "Janchi", kende tabata president di e Central Comitee na aña 1958, a worde eligi atrobe como tal, mientras cu Sr. Mingo Salazar, kende na ultimo ora a dicidi di pone su persona reeligible, a sali como tesorero, y Sr. Watty Chai, representante di Toeristenbureau lo tuma e secretariado over.

E otro miembronan di Comitee ta Julio Luidens, Reggie Henriquez, Alfons Geerlings, A Tjie A Loi, mientras cu Lorenzo Arends lo ta e contactman di e Asociacion di Comerciante.

A worde dicidi, e mesun anochi ey, pa tene e eleccion y coronacion riba dia 2 di Maart na Wilhelminastadion, y e paradanan di San Nicolas y Oranjestad lo tuma lugar dia 3 y 4 di Maart respectivamente.

Cu e Comitee nobo ta activo, a worde demostrá door di e hecho, cu nan ta reuniendo cada dos dia, pa bin cla cu tur e preparacionnan necesario, debí cu nan a priminti, cu apesar di e tempo cortico cu a keda nan, e Carnaval di e aña aki, lo surpassá sin duda alguna, tur otro Carnaval tení riba nos isla.

Un bunita gesto tabata e idea di a anunciá door di radio y prensa, pidiendo tur e personanan cu a gana premio aña pasá, y no a haya esaki ainda, di acudi mas pronto posible cerca e secretario di e Comitee nobo, pa nan regla e asunto aki.

Pa evitá futuro confusion, en conexion cu distribucion di premio, nan a dicidi di pone un baile "Mardi Gras", dos dia despues di e parada, durante cual fiesta e premionan di e aña aki lo worde entregá na e ganadornan.

Segun nos a worde informá e Comitee lo reuni awe nochi atrobe na Toeristenbureau.

24 Januari 1962